

重修兩淮鹽法志

兩淮鹽法志卷一百二十三

雜稅門

湖北宜沙提課

軍興淮綱運阻始而川省零星小販沿江灑賣繼則大估連檣浮舸東下當事因爲化私爲官之法遂於宜昌每斤抽錢二文半於沙市每斤抽錢四文半歲得川釐一百數十萬緡由是岳澧常德皆設局抽取重釐其他發售各口岸又莫不設有釐金局遂以贍飢軍而濟民食則始事經營之功不可沒也志宜沙提課

咸豐三年六月戶部議覆署湖廣總督張亮基奏湖南北

借運鄰鹽由官借運價貴而不能勝私曷若化私爲官  
價平而兼可濟課擬請此後湖南北需鹽接濟應仿明  
臣王守仁立廠抽稅之法凡川粵鹽斤入楚無論商民  
均許自行販鬻惟擇楚省堵私隘口專駐道府大員設  
關抽稅或將本色抽收或令折色輸納十取一二以爲  
定制一稅之後給照放行由各該省妥立章程奏明權  
宜辦理

互見借  
運鄰鹽

咸豐三年七月沙市川釐局知縣鄭蘭稟奉委辦理沙市  
鹽釐業將至鎮日期稟報在案茲奉藩司發到木質鈐  
記一顆卽行出示曉諭擇地設局數日以來陸續到有

水販鹽船足資銷售責令行戶開導過稱收課發票該  
水販亦尙稱明白大義不致滋事惟鹽船到岸往往不  
服盤查既不能以理喻復不能以勢禁惟有就起坡之  
處加意巡察嚴杜偷漏而已所有見辦章程另摺呈鹽  
一淮商籌備資本借買川引到沙核明成本水腳酌  
定價值發售再行酌提公費聽水販買至各地行銷沙  
局填給印票交收爲據卽暫時招徠私販提課後如有  
願赴他處行銷者亦給予印票限以時日引地如逾期  
越界仍以私論庶姦販無從作弊而下游亦免勒索  
一沙鎮舊設有一卡今查得沙鎮支港寥闊添設兩卡

每日親自到卡查卡距局數十里之遙一身不能周顧  
擬添兩員幫辦 一前定十五文之數原係徒有其名  
當時曉曉以致暗放斤兩巴東業已收課饒丞查辦正  
嚴且各處設卡重重決無偷漏到沙補收之理是以商  
販到沙總藉口於業已納課執有票據卑職以爲與其  
虛報不如徵實見定實收每斤五文向買戶名下徵收  
儻使一無虛冒則錢數雖少而鹽數較多於事亦尙有  
小補但無如各行賢愚不一不能無弊卑職細思撤去  
行戶局收局賣事萬不行除傳齊各行面申嚴禁外擬  
嗣後鹽斤到行報明局中眼同過稱先絕虛報再爲相

機而行 一沙市設局立卡局中租賃房屋置備器用  
委員薪水火食書差飯食卡上幕友束脩差役人工哨  
船哨夫油燭等項零雜款目正繁未便從正課開銷查  
沙鎮各行向例取行用三分今開設總鹽行銷數較廣  
其利自溥未便盡充行戶利橐擬分半提取以充局中  
公用每月約可得八九百串及千餘串不等藉可敷衍  
此項用款開銷應免其造冊報銷 一課錢向收足數  
錢文而街市通行皆九八底數以後解課亦以九八數  
爲便應請將此項底串錢文作篋包繩索挑力運腳及  
錢鋪津貼之用 一江水長落不時每年夏季江水正

漲卽舟楫暢通卑職未到以前沙市鹽價騰貴眾口嗷  
嗷有淡食之虞竊思旣設鹽局則鹽斤斷絕之時自應  
設法接濟民食應請於來源極旺時借動數日所收鹽  
課酌量採買存積以應不時之需該商人不能積貨居  
奇亦藏以待乏之意也如鹽斤短少時平價發賣估其  
價本稟報解省 一水販自運之鹽旣在入楚首站巴  
東地方抽稅勢不能於荆沙重徵是以按照荆關落地  
之稅法收取其沙市起坡之鹽按數收繳其過江等船  
概置不問 一每日起鹽先由行戶至局報明某戶起  
鹽若干掛號訖由行起稱下河局內家丁一名差二名

偕往視稱打碼包上打紅土印至晚由行結算送局請  
票限五日一繳課錢一沙市地面寥闊稽查艱難擬  
派家丁三名差十二名在岸路梭巡河下派哨夫八名  
差四名哨船四隻在江面梭巡晝夜輪流以免偷越經  
湖廣總督張亮基批據稟於來源極旺時借動數日所  
收官課收買存儲以備缺乏所見甚卓鹽之一事來源  
多則其價驟賤來源少則其價驟貴古人所以有常平  
鹽之舉也該令既見及此可悉心籌畫如實須寬爲豫  
備卽酌量數目稟明辦理務期於民食

國課兩有裨益是爲至要



咸豐三年七月沙市川釐局知縣鄭蘭呈報沙市提課章程

一楚地向食淮引因江路阻梗借運川引前奉奏定之引不敷民食所有川販自運之鹽准其發售以濟民食權宜提課藉補兵餉 一川鹽入楚先過巴東宜昌等處越數百里至荆沙故於巴宜兩處設定總局委饒丞拱宸辦理提課原擬照官稅之數每斤十五文一稅之後至荆沙各處不復再稅嗣因水販無力呈繳闖卡愈多以致暗放斤兩商販到沙總藉口於業已納課執有票據爭執不已目前爲安靖地方並濟民食起見不得

不略示權宜經饒丞稟請於巴宜收取賣課到沙市發  
售者收取買課每斤五文庶免一鹽再稅之目而姦販  
亦不致滋鬧 一於沙市設立公局僅管近沙各處水  
販到沙發售者由行戶報局局中派丁及差執票到船  
眼同過稱填給印票向買戶取課如有私行起坡者卽  
以私論其由宜局給發買票至他處發售者沙局驗照  
放行不取課費 一於江陵之李家口箬箕窪觀音磯  
郝穴四處設立四卡每卡派幕友家丁二人巡役四人  
哨船四隻沙局招募書識兩人差十六人哨船四隻巡  
快水手十二人晝夜梭巡以防偷渡 一課項由行戶

呈繳逐日提收細數按旬通報一次其課或俟積多再行解省或奉提奉撥批解

咸豐五年沙市川釐局知縣鄭蘭稟沙市設局抽取買課凡從江面直下及往湖南等處之鹽概不抽取四年經宜昌府稟宜昌祇收賣課紅花套以下歸沙市提取買課閏七月稟准設密灣太平口筭箕窪董市江口洋溪等卡募兵勇堵截九月始照五文抽收過江鹽船之稅事屬勦始人心洶洶卽五文之數亦恐不足試行三月課漸充裕五年二月復添高家套宜都兩卡浣市一處係太平口分卡幫同稽查時設時歇其筭箕窪密灣兩

處歸局中發票取課祇管稽查偷越其太平口自三月至九十月所收較多爲沙局課費大宗江口以上各卡藉以查三百餘里之江面就近繳課者至微至細甚有不敷局用之處按照局例除漕三成收取爲便民食安地方起見也其各處課費統歸局中按月並算總報其各處卡上開銷稟定從沙市起坡鹽斤分提行用並底串開支不另開公費並免報銷自四年九月未收過江稅以前每月祇收稅萬串四年春夏兵亂之際或數十串不等九月後至二三萬串旺月有六七萬串七八萬串之多

咸豐五年十二月湖廣總督官文奏川鹽設局收課於四年八月經前督臣楊需委員專駐宜昌每斤抽銀一釐五毫每月徵收銀一萬數千兩及二萬餘兩不等迄今載餘總計銀二十餘萬兩隨時湊濟軍需又襄陽一帶川鹽以道遠鮮到潞私充斥經安襄鄖荆道羅遵殿於樊城宋家埠等處設局每斤抽錢二文每月計收錢二三千串不等作爲防堵經費今則賊蹤漸清軍餉甚鉅計惟於勸捐收課二事先行設法圖之茲據鹽法道常恩將抽稅定章議詳前來查淮鹽及川私潞私票私均應於來源要隘設局稽查酌定每斤抽取課四釐四毫

核與淮鹽六百斤一引抽取正雜課銀二兩六錢八分  
數目相等其川私歸併宜昌設局抽課淮鹽於賊氛切  
近地方設局抽課潞私於襄鄖隨棗等處設局抽課票  
私於安麻孝應等處設局抽課委員分司其事製備照  
票蓋用鹽法道印信編列字號分發各局收課發票於  
各分路地方立卡查無偷漏夾帶立即驗票折角放行  
嗣於六年正月戶部奏宜昌設局每斤一釐五毫年餘  
已收銀二十餘萬兩今酌定每斤抽銀四釐四毫比前  
一釐五毫加增幾至兩倍卽宜昌一處而論每年約可  
抽銀五六十萬兩他如抽收淮鹽潞私票私等處課銀

南洋匯報  
卷一百一十三  
一  
當亦稱是應照淮南抽稅章程轉飭各局員將抽課若干五日一報總督按兩月一次彙總奏報並令將宜昌及樊城等處抽收銀錢先行報部查核

咸豐六年二月沙市川釐局知府鄭蘭稟稱卑府於咸豐三年七月奉委由沙設局抽提起坡鹽稅議定每斤五文不分正課公費一併解作兵餉當稟奉各憲批准在案是公費卽在正課之中一時因章程未定故未稟請分晰定案嗣以兵事絡繹省城戒嚴更未便以瑣屑之詞上瀆憲聽上年九月因過江收稅漸多隨於十一月間稟明前制憲楊請定每斤四文五毫公費五毫以作

省城善後公用並申明沙市局卡各費有行用提充仍不在公費上提取分文適五年正月賊又上竄尙未奉到批示是以未敢擅分仍然並徵並解蹉跎又一年矣伏查淮引行銷有正課有雜課所謂雜課者亦如地丁之有耗銀各項之有平餘也茲借銷川引雖前奉部文仿照前明王守仁設廠抽稅之法然同一川鹽宜昌提取賣課沙市提取買課雖分而實合宜昌已酌提公費而沙市課費不分將來奏咨難爲准則應請仍照前議定爲每斤正課四文五毫公費五毫自本年正月始分別摺報仍一併彙解其費作何開支俟省城收復後稟



請核定分撥至宜昌於公費內分成作爲局費沙市則有行用可提所差有限無需分撥經湖廣總督奏定章程每斤五毫作爲公費於六月始分別摺報

咸豐六年三月湖廣總督官文奏前因楚岸淮運久梗議由江浦改路來楚並督辦川潞票私接濟民食抽課充餉經部核覆咨行在案所有潞私票私設局收課事宜已飭北鹽法道常恩試辦惟是安襄鄖德四郡皆與豫省接壤鹽販由陸路而來率多肩挑背負任意侵灌見定提課之舉事屬剗始在各販利較鉅多方趨避恐一時遽難收效至淮南鹽引改道處連需時是以前奏

藉寬日前川潞之禁以便民食並濟軍需溯查近年楚省借食鄰鹽以川鹽爲最前署督臣張亮基曾奏定借銷川引化私爲公試辦之初責成地方章程未定商販抗違毫無成效迨至咸豐四年九月前督臣楊需始專委荆宜施道莊受祺設局宜昌無論商運私販概准行銷引課仍歸川省以充正款私課抽自楚北而濟軍需惟查川鹽成本甚重較之淮鹽倍蓰若提課太多販者無利可圖非裹足不前卽繞路偷越經莊受祺議定每鹽一斤提課錢二文五毫每月收課之多寡視運售之暢滯有旺有歉或三四萬串或四五萬串不等此宜昌

取課於商販情形也又在荊州府屬沙市地方設立分局委署荊州府同知鄭蘭專司其事倣照荊州府落地商稅之法有商販至沙市售賣鹽斤者由行店在於買戶名下每斤抽課錢四文五毫每月亦收課錢二三萬串有奇其停積未售者概不抽取此沙市取課於買戶情形也統計荊宜二府抽取鹽課於一買一賣之中分地完課合計每斤共收錢七文合銀三釐五毫之數迄今試辦年餘遵行漸久商販買戶無不樂從緣川鹽係本重利輕變巫以上來楚鹽斤亦有提抽之舉若楚北再議加增恐觀望偷漏轉滋弊生沙市買戶係一方民

食攸關收課已倍於宜昌亦礙難議加雖與部議稍有未符非此不足以廣招徠而示體卹自當仍循其舊候江路肅清淮鹽暢行應一律禁止保全淮綱引地其沙市鹽局歷月所收之項臣前在將軍任內因旂營官兵月餉積欠日甚屢懇

恩撥解川餉久累鄰圻遂與前督臣楊需會商自四年冬季起每月在沙市鹽課項下提解以錢易銀一萬二千兩爲支放旂營月餉之用應歸正款造報雖未足月餉之半幸旂兵賴此藉免噉飢號寒已經撥解年餘鄰省得免撥解之艱旂兵得免凍餒之虞其沙市每月餘課及

宜昌收課自上年五月到任後皆撥給撫臣胡林翼大營充用兵餉並荊州後路糧臺置造撫臣大營一切軍裝自四年九月開局以來至五年十二月止荊宜二局於一買一賣之中共抽提鹽課每斤按七文合銀三釐五毫統計合銀四十餘萬兩之數見飭莊受祺等將每月出入未報各款分晰造冊俟按次查清另行咨部存案外惟有督飭各府委員認真辦理一買一賣仍收七文暫緩加增嚴查偷漏收一分之課濟一分之用

咸豐六年七月湖廣總督官文奏竊臣前因荊宜二府分設川鹽局卡抽課濟餉辦理已有成效當經恭摺具奏

接准部覆行令將抽收課銀數目按兩月一次奏報等  
因當卽轉飭各局員認真經理銀錢兼收茲據荆宜施  
道莊受祺候補知府鄭蘭將本年正二三四等月分抽  
收鹽課銀錢數目開報前來宜昌鹽局正二兩月共抽  
收課銀三萬一千九百七十六兩三錢九分八釐五毫  
制錢一萬四千九百六十八串九百十七文又三四兩  
月共抽收課銀五萬七千四十三兩二錢四分五釐制  
錢二萬六千六百二十串一百八十一文又荊州鹽局  
正二兩月分共抽收課錢八萬七百九串六百九十五  
文又三四兩月共抽收課錢十二萬六千三百六十串

五百文以上四箇月共抽收鹽課銀八萬九千一十九兩六錢四分三釐制錢二十四萬八千六百五十九串六百九十三文除撥發荊州滿營及荆宜施水陸各營官兵月餉外其餘銀錢俱隨時解大營接濟軍需查湖北借食川鹽原無定額視商販之多寡定課項之豐嗇除仍飭嚴查偷漏核實抽提按兩月一次奏報外統候年終再將抽收支解數目造冊咨部查核

咸豐九年六月湖北鹽法道顧文彬札沙市川釐局奉湖廣督憲官札開照得鹽道有全省鹽法總策之責見在通省肅清應遵舊制以便造報所有川鹽徵課事宜自

應該道總理發給印票以專責成惟相距寫遠恐日久  
弊生難於查察仍飭荆宜施道協同辦理認真巡緝以  
資周密一切內銷外銷帳目每月會報本閤部堂隨時  
調查以裕軍需而重鹽政毋稍疏懈致負委任等因札  
局遵照迅速備具三聯空白印票編列字號數千張多  
爲豫備星馳稟賁以憑蓋印發用仍將逐日過鹽收課  
以及填發印票字號各數目按旬分別造冊稟賁合辦  
咸豐九年七月湖廣總督官文批沙市川釐局稟復鹽務  
稅票由省用印窒礙殊多請遴任賢員或可設法遵行  
一件查沙局所收川鹽課費久經明定章程數載以來



商民稱便見非另議改章並與商販無損祇因今循舊制由鹽道總理以憑奏咨至鹽道發給印票而該委員稽查課費專司收解仍得照常辦理卽印簿蓋用道印首列該道銜名亦准該丞列銜其次商民祇知照章完課豈有因改發道印票據而別生疑慮反欲憑木戳者乎至撥票宜如何分別亦應由該委員妥議稟辦率以窒礙難行呼應不靈爲詞該委員於本閣部堂前飭並未詳覆卽負氣藉此辭差任意驕縱意在獨專成何政治殊屬不知大體仰北鹽道會同布政司嚴行申飭一面由道將所稟各情妥議詳覆飭遵如該道蓋印往返

需時卽附近請用荆宜施道印信事在必行毋任撓阻  
咸豐十年閏三月湖廣總督官文批沙市川鹽局稟鹽稅  
短絀不敷滿餉一件查荆州滿營兵餉於沙局節省五  
成工費項下不敷支解業據該丞稟經批令移飭在於  
宜昌公費項內提撥解給在案茲據稟前情仰北布政  
司立即查照前批迅飭該丞遵照辦理並移荆宜施道  
暨鹽道一併查照飭遵

同治元年五月湖廣總督官文奏楚軍連年援皖餉需日  
絀咸豐十年秋閒圍攻安慶欠餉甚鉅迨江甯將軍都  
興阿回防揚州維時各路待餉孔殷當由臣會同前撫

臣胡林翼首倡捐廉率同司道一體捐湊接濟仍屬杯水車薪因復札飭鹽法道厲雲官等轉行宜昌沙市鹽釐局委員體察商情議由湖北運銷川鹽酌量加課卽於十年八月妥議試辦宜昌局賣鹽每斤加課五毫連原納一釐五毫每斤共收課銀二釐作錢五文沙市局買鹽每斤加課錢二文連原納錢四文五毫每斤共收課錢六文五毫以上祇增鹽課並未另加公費試辦以來甚屬相安自十年八月初一日起截至十一年十二月底止宜昌局共收加課銀八萬一千七百九十五兩五錢沙市局共收加課錢二十一萬七千六百六十九

串入百九十二文業經全行彙入宜沙收課數內按期  
奏報第因川疆不靖井竈被焚商運停滯按計月收課  
數未能如前暢旺惟有仍飭鹽道會同荆宜施道督率  
局員設法招徠隨時整飭務期漸有進步庶於民食軍  
儲兩有裨益

同治二年十一月鹽政曾國藩咨湖廣總督查淮南鹽課  
楚岸運銷最廣咸豐辛卯綱每引六百斤湖廣省額行  
鹽四十一萬三千四百五十六引自粵逆竄擾奏明湖  
北抽收川鹽釐金湖南亦收粵川各鹽之釐准其借運  
淮引地界原係一時權宜之計上年江路漸通各商販

雇用輪船拖帶淮鹽行至漢口售銷鄰鹽價輕不能相敵幾至無可覓銷據官商稟請收復引地本部堂一以輪船拖帶洋人之流弊無窮一以鄰鹽若停楚省之餉源有礙是以未經舉辦今幸九洑州克復長江暢行無阻淮南引鹽自應設法運銷惟兩湖軍餉取資鄰鹽甚鉅亦未便驟然禁絕惟有加收鄰鹽之釐俾鄰本重而淮本輕庶淮鹽得以逐漸進步而鄰鹽亦可化私爲官實爲兩全之策見經核定章程川鹽入鄂於荊州加抽釐錢每斤八文粵鹽入湘於衡州加抽釐錢每斤八文所有貴省舊設鄰鹽釐卡仍請照章抽收查照施行

同治三年八月湖廣總督官文片奏再楚北武昌漢陽安陸襄陽鄖陽德安黃州荊州荊門九府州所屬及宜昌府屬之東湖歸州長陽興山巴東五州縣地方向爲淮鹽引地自粵匪竄陷金陵長江梗塞引岸廢弛經前督臣張亮基借食川鹽化私爲官於荊州宜昌設局委員抽收釐稅以充軍餉而濟民食原係一時權宜之計自九洑州克復江路通行兩江督臣曾國藩奏請重整淮綱規復舊制先准咨送章程條款以川鹽入鄂行銷已及十年之久湖北軍餉資於川課者甚鉅未便驟然禁絕惟有加抽鄰鹽之釐俾鄰本重而淮本輕庶淮鹽得

以漸進等因伏查湖北軍餉以川課爲大宗淮鹽甫經  
試辦能否暢銷尙無把握仍須並提川課俾餉項得有  
補苴其餘正課之外加抽錢文飭據司道會議川鹽運  
官同治三年四月初一日起除照舊完納正課外每斤  
於荊州加抽錢三文宜昌加抽錢二文均由原設荊宜  
二局附收不另設局以節糜費經臣會同兩江督臣湖  
北撫臣出示曉諭在案茲據湖北布政使厲雲官鹽法  
武昌道盛康詳稱自加課以來商力雖多拮据該委員  
等妥爲勸諭均已遵照加抽所有加課錢文以一半移  
解漢口督銷局歸於兩淮撥用一半仍歸楚北糧臺湊

充軍餉等情呈請附奏前來除嚴飭認真辦理外應將  
抽收正課及加課銀錢數目仍按兩月奏報奉

旨戶部知道欽此

同治三年八月鹽政曾國藩咨湖廣總督查湖北加收川  
釐刊章內本係敘明每斤加收八文旋因試辦伊始未  
便操之過急先在荊州每斤加收錢三文宜昌每斤加  
收錢二文在案茲查前項稅錢加收以後川販暗將鹽  
本減跌仍復源源而來宜昌首卡自四月初一日起至  
六月底止川鹽到楚之數逾於淮鹽一倍以致淮銷疲  
滯商販觀望惟有再將川釐酌加以重資本而暢淮引



應於宜昌每斤再加二文荊州每斤再加一文仍歸淮  
楚各半分用川販決不爲難軍餉不無小補與刊章原  
定數目亦屬相符候湖北軍務大鬆再行奏請全停川  
鹽十一月官文覆咨據湖北藩臬兩司鹽法武昌荊州  
兩道會詳稱據宜昌委員劉丞等沙市委員張丞等具  
稟以川鹽成本過重川商力不能支前此加課已屬竭  
力勉從今若再加勢必裹足於鄂餉大有關礙等情本  
司道等覆查宜沙兩局自本年加課以來所收川鹽稅  
釐漸不如前似於過川運淮已有明效惟是鄂省餉用  
日絀全省錢漕每歲除解外不敷一月之用近年寇氛

屢擾楚疆水陸各師四路防勦月需餉項甚鉅兼以連  
年積欠本省及鄰省兵餉不下五六百萬各營索欠羽  
檄紛來見在移東補西尙可略爲支持者百貨釐金之  
外祇賴川鹽釐金藉資湊用且荊州滿營兵餉每年三  
十餘萬亦須在於荆沙月收鹽釐項下就近撥解前經  
議准酌加五文未及一年又欲再加收三文勢必皆思  
歇業兩淮鹽運又不能暢行楚餉無出決裂堪虞卽如  
淮鹽自四月至今鄂省共祇收釐六萬三千兩川淮相  
較何止什伯其不足爲鄂省補苴者明甚基本司道再四  
籌議惟有請將續加三文之釐暫行從緩俟鄂省軍務

告竣欠餉稍輕再酌量辦理等情本爵閣部堂覆查無  
異相應咨請查照暫緩加抽庶於商情餉需兩有裨益  
曾國藩覆咨見查鄂省逆氛已一律肅清淮商禁私之  
請益堅戶部催課之文疊至湖北司道皆有督銷淮鹽  
之責如能共維大局亦宜川淮並籌今乃稟請緩加川  
釐深恐川私稀少楚餉短絀殊不知淮鹽不能暢行者  
皆由川私占銷之故卽如秦局請運已過十三萬引鄂  
局售銷僅過二萬引其荆宜襄鄖等府各暢岸徧地皆  
私淮鹽止在武漢黃三府稍稍運售銷數如何能暢無  
怪淮販嘖有煩言況查宜昌首卡報過川鹽數目自七

月初一日起至九月底止照准鹽每引六百斤計算共過四萬一千三百六十餘引仍較淮鹽到數多至一倍有餘則過川通淮之明效安在若不再將淮引設法疏銷則已到者守輪日久無不虧折堪虞未到者爲數較多勢必益形壅滯何以廣招徠而裕課餉爲今之計惟有暫照前咨速將川釐再加庶與鄂淮均有裨益請煩查照轉飭荆宜兩局刻日加抽如果加抽之後淮銷得有起色卽將川私略緩數月奏停亦無不可

謹按嗣經官文咨覆終以需款浩繁皆賴川鹽釐金濟助若再行加抽川販禁絕實於楚餉有礙曾國藩

因川稅不可再加乃將鄂岸淮釐每引四兩二錢項下減去一兩八錢以輕淮本

同治五年十月湖北布政司何璟按察司丁守存鹽法道盛康荆宜施道鄭蘭等詳竊奉憲臺面諭兩湖鹽務見擬川淮配銷飭將三省會商章程彙核議詳等因伏查湘鄂借食川鹽抽釐濟餉厯時已久淮運通行之後兩江爵閣督憲曾奏明川淮並行原於規復淮綱之中仍寓保全鄂餉之意自上年湘省督銷局出示川淮並價輪銷因而川商裹足私販舉興淮引滯銷鄂釐減色本年四月間本司道等以鄂省之盈虧關乎川鹽之通塞

詳請酌量變通節蒙憲臺函商署兩江督憲暨湖南撫  
憲體念時艱統籌兼顧重議川淮並銷章程擬在湖北  
宜昌府設立川鹽總局遴委坐辦大員經理其事並由  
兩淮委員會同辦理倣照淮鹽辦法總收分解並將兩  
湖銷川銷淮口岸分別酌定法良意美洵於三省餉需  
均有裨益除未盡事宜應俟委員到局體察情形隨時  
請示遵行外所有飭議章程本司道等謹就原發八條  
公同酌議理合會同詳請憲臺俯賜查核分咨試辦俟  
有成效再將章程刊刻飭遵惟川鹽總局事務殷繁亟  
須委員綜理茲查有候補知府周樂補用知府陳建侯

爲守兼優於鹽務情形尤能熟悉堪以坐辦可否由憲  
臺會同兩江督憲聯銜給委以資得力 一配銷定額  
查楚岸本係淮鹽引地今因兩湖借食川鹽已久抽釐  
濟餉未能驟禁惟有遵照曾爵閣部堂原奏川淮并行  
核計上年銷數淮鹽鄂岸約銷九萬引湘岸約銷七萬  
引川鹽按照淮引正餘斤數約銷二十二萬餘引共銷  
三十八萬餘引見稍從寬酌議共定額銷四十萬引川  
淮各半分派川鹽限銷二十萬引淮鹽鄂湘本係定額  
二十四萬引見亦先儘二十萬引行銷如兩湖應銷淮  
鹽地方銷數起色額數不足再將淮鹽已認之四萬引

推廣疏銷如兩湖應銷川鹽地方鹽不敷銷亦應由川  
鹽總局酌將下年川引提前趲運至多不得過二萬引  
之數緣川淮既經分地行銷未便再有混淆自亂其例  
一設立局卡查川鹽來楚向無一定口岸今擬於巴  
東上三十里之官渡口設查驗卡先將每船每艙裝鹽  
包數船戶姓名查明發給護照艙單再於離宜昌三十  
里平善壩設掣驗卡驗明官渡口之照單抽包過掣運  
至宜昌府城外川鹽總局掛號用官稱復驗斤數計斤  
收釐按旬通報仍按照鹽到先後派檔輪售填發水程  
其未掛號以前無護票艙單既掛號以後無總局水程



者均以私論並令官渡口查驗卡先將所過鹽數按三日分報一報宜昌總局一報平善壩卡如有中途偷逸不到者逐程查拏 一委員經理查湖北督銷局係由兩江鹽院派員至楚會同兩湖督部堂聯銜會辦所有宜昌川鹽總局應由湖北遴派坐辦大員兩江亦派道府一員均彼此聯銜給札會同鹽道荆宜施道辦理官渡口查驗川鹽卡亦由湖北派員管理仍由兩江派員會辦此後兩省合爲一家渡口宜昌兩局公事彼此均應通詳互相稽考淮鹽仍由兩江鹽院主政川鹽仍由兩湖督部堂主政意見不合者咨商妥議另頒川鹽總

局關防交坐辦之員領用其水程仍用鹽道關防以符舊章 一抽收鹽釐查川鹽入楚宜昌每斤抽釐錢六文又加稅錢二文沙市每斤抽釐錢七文又加稅錢三文新隄每斤抽釐錢四文其運至湖南者各口岸均有抽收此次既歸宜昌總局經理擬倣照淮鹽辦法策計各處抽釐數目無論運往湖北湖南銷售酌定每斤抽釐錢二十四文統由宜昌總局一併經收填給水程惟從前川鹽經過各卡每多暗放斤兩見經核實辦理自應明定斤數擬照淮鹽章程以每引六百斤扣算外加滷耗包索餘鹽六十斤津貼商販核計係一成之數川

鹽不能逐包計引應於過稱後照扣一成以歸簡易而示體卹此外如有隱匿斤兩卽照例嚴辦經過湖北湖南各水卡止須驗明水程不再抽收分文至酌提公費一節查湖北向章宜沙兩局每斤共提公費錢一文五毫奏明以一半解充鄂餉一半作爲公費均報部分別核銷此次宜昌設立總局及各分局卡用度較多擬於每斤二十四文之內提公費錢二文仍照奏定章程一半解濟鄂餉一半作爲局用以及地方水陸緝私等用按年報部核銷一酌定鹽價查川鹽成本較重色味亦較佳若與淮鹽一律定價必致有累於川而民間

貪食便宜亦恐無益於淮鹽擬照淮鹽辦法於商販在  
宜昌買鹽時由總局核計本商成本釐課之外予以應  
得之利惟川鹽廠價低昂不一擬先咨會川省將廠價  
隨時移知分別酌定價值通報查考由局懸牌其有本  
商原船載至沙市及轉運湖南由行發售者亦由總局  
飛知常德沙市各分局以杜搶跌之弊 一分派釐餉  
此次兩江兩湖會同設局所收川鹽釐課每月應以十  
成核計派解兩江二成湖北六成湖南二成均由宜昌  
總局分別委解年終彙算如淮銷多於川銷則以淮補  
川川銷多於淮銷則以川補淮其貼補之法兩江多銷

則將淮釐內派解鹽院之三兩八錢零每引提出一半貼補鄂餉兩湖多銷則將川釐內應歸鄂省之六成每引提出一半貼補淮餉如此不分畛域於鄂淮餉需均有裨益而辦理亦不至掣肘矣 一酌分銷路淮鹽督銷局設漢口則武漢黃德四府以食淮鹽爲便川鹽局設宜昌則荆宜兩府以食川鹽爲便嗣後武漢黃德四府盡銷淮鹽川鹽不准下駛荆宜兩府盡銷川鹽淮鹽亦不上運越境卽以私論其安襄鄖三府暨荆門州所屬則均川淮並行無論銷淮銷川一律售賣見銀以歸畫一而免取巧至湘省川淮銷路見已議明長沙衡永

三府專行淮鹽澧州及辰沅永三府專行川鹽岳常寶  
靖四屬則川淮並行凡兩湖川淮並行之處聽從民便  
彼此不得抑勒俟軍務平定奏停川鹽復還淮鹽引地  
以符舊制 一嚴禁私販襄樊一帶向有潞私黃麻一  
帶向有淮北私近年均設卡抽釐聽其販賣查此項鹽  
釐收數無多既無裨於軍餉而四路侵灌實有礙於鹺  
綱應一律嚴禁由兩湖督部堂湖北撫部院通頒嚴札  
責成湖北地方營汛幫同督銷局實力巡緝毋許闖入  
以廣銷路如地方官陽奉陰違引銷不暢由督銷局分  
別稟請參辦經著湖廣總督譚廷襄批查楚北軍餉以

鹽課爲大宗見在淮鹽尙未暢銷而川鹽則試行已久  
餉源所在勢難驟停第兩湖本淮綱引地酌分銷路仍  
恐不免彼此侵灌且淮鹽色味稍遜川鹽民間多食川  
而少食淮儻川暢而淮滯淮必歸咎於引地之不復淮  
暢而川滯川亦藉口於銷路之不均卽如岳州一郡湖  
南不無川鹽並行兩商久未答復川商已兩次具呈察  
審情形不若率由舊章川淮並行不必分界之爲得也  
至宜昌設立總局裁撤分局如果辦理得人事歸簡便  
費亦節省應令揀熟悉鹽務之員刊給關防詳請委辦  
又官渡口填給艚單宜昌總局填給印票所過水卡照





淮二文五毫歸鄂充餉統計收錢一十八文

同治六年五月署湖廣總督譚廷襄奏竊照湖北宜昌沙市設立鹽局卡抽課濟餉歷經辦理在案惟自宜至沙水程三百六十里中間雖設有稽察分卡而道路綿長偷漏在所不免欲杜偷漏必多設分卡設分卡必添增局費臣與在省司道悉心籌議宜昌爲川鹽入楚必由之路擬將宜昌鹽局改爲總局凡沙局抽課一切事宜併歸總局辦理沙市爲水陸通衢盤堤過載之鹽甚多應改爲稽察分局並於宜昌上游之巴東縣設掛號卡平善壩設廠掣驗川江水發則改由西壩上之屯甲沱

掣驗以便停泊而易稽察凡川鹽入楚之先由巴東卡  
挂號報明包數發給倉單至平善壩掣驗相符下至宜  
昌總局按斤抽課除應完宜課外沙課一併抽提發給  
水程開艚銷售儻包數不符或沿途盜賣查出究懲宜  
昌爲川鹽總匯課由總局總提則偷漏可截矣宜昌以  
下向設稽查分卡今沙局旣已歸併則宜都枝江洋溪  
董市江口高家套太平口沱市審灣九處分卡皆可裁  
撤而糜費可節矣惟改章之初必須大員坐辦查有本  
任漢黃德道鄭蘭穩練精細歷辦宜沙鹽務情形最爲  
熟悉已由臣會同撫臣札委馳赴宜昌攜帶告示曉諭

開局照章試辦如有官役侵漁隱匿等弊指名據實詳請參辦所有課項宜昌每鹽一斤抽課釐銀二釐向係折收錢五文以錢易銀如遇銀價平減尚有盈餘充餉此次併局之後宜昌收正課錢五文公費錢一文加課錢二文沙市收正課錢六文五毫公費錢五毫加課錢三文合計兩局每鹽一斤共收錢十八文除提解京餉支發荊州滿營暨荊州水師礮船月餉按照市價易銀外其餘均由坐辦之員收錢解錢涓滴歸公以免周折所有收數仍按兩月一次奏報其撥解各數目因省外文報兩月內未能彙齊款項易致參差應請六箇月彙

報一次以憑稽核據湖北布政司何璟按察司李榕鹽  
法道盛康署荆宜施道何元普會詳前來臣覆加查核  
偷漏既截多一分課卽得一分之用分卡既截節一分  
費卽多一分之餉相時立法悉歸簡捷於商情既無煩  
擾於軍餉可望補苴除咨部查照外謹會同湖北撫臣  
具陳奉

旨戶部知道欽此

同治六年八月掣驗川鹽局委員陶慶祜稟查宜昌郡城  
設立川鹽收稅總局其上三十里地名平善壩凡鹽船  
經過有專司挂號委員逐一填單飛送郡局核對鹽船

到宜昌城河又有司事出哨巡緝挂號馳報局員卽親身坐划逐船掣驗完稅後分撥下行經過宜昌城河之下設有哨船委員帶同書役驗票放行下哨對岸設卡名曰西哨派有委員丁役晝夜梭巡以防偷漏陸路盡屬山徑崎嶇恐有私販肩挑背負繞道偷越向於宜昌東西南北城外設立緝私卡兼收驗陸路放行鹽票各卡均地居要隘碁布星羅防範甚密卑職復向各委員查詢向來風聞如何有兩包三包之鹽祇完一包之稅或經卡員查出隨意補完名曰補稅之說據該委員等聲稱宜局查船向係委員專責親自下河逐船點包過

稱每包斤兩均係實數實報從無減讓惟自宜完稅後有湖南小船來宜購買不能裝整包者方裝散艚經過下游太平口等處卽係沙市鹽局所設分卡每見鹽包不符查出作爲餘鹽折算補罰是以有兩三包鹽完一包鹽之說此係沙市各鹽卡通融之事宜昌鹽局並無此弊宜昌每鹽一斤完稅錢八文去年共收錢一百萬串有零沙市每鹽一斤完稅錢十文多於宜局二文而去年祇收錢六十餘萬串兩相比較其理甚明且川局委員王政王肇基等同淮局監收委員史櫟善每日掣驗鹽船便衣坐划無閒寒暑旣不經收銀錢亦不與川

商往來其帳務一切向由鹽道荊州道延請親信戚友在局經理卑職查明暗訪僉以爲然見將沙局歸併宜昌川鹽每斤應完稅課十八文統歸宜局總收地旣扼要事更認真一切偷漏通融之弊自可杜絕矣經鹽政曾國藩批掣驗川鹽一事在鄂以無損釐數爲主在淮以有益銷數爲主仰該丞二者兼籌權衡斯當

謹按光緒十年江防戒嚴署湖廣總督卞寶第奏准川鹽每斤加防費錢二文十一年兩江總督曾國荃奏准在宜昌加抽川釐每斤三文連前十八文計川鹽每斤共抽錢二十三文

兩淮鹽法志卷一百二十三

鄰稅門 湖北宜沙提課



兩淮鹽法志卷一百二十四

鄰稅門

湖北宜昌加釐

自川鹽借銷楚境駸駸有奪淮之勢同治初年定章於湖北宜昌湖南澧州之花畹岡抽收鄰稅每斤收釐錢八文厥後宜昌改爲每斤抽錢五文同治六年歸併川釐於宜昌總局每斤抽錢十八文其他分局悉皆裁撤至光緒十年海防事起餉源竭蹶乃設局萬戶沱加抽每斤三文以符八文之舊當時川楚交爭不以爲暗禁川商卽以爲無益江餉而實則自加抽以後歲入二三

十萬緡爲江南餉需一大宗至今川鹽不因之而停鄂  
餉不因之而絀謂川商力盡運艱豈篤論哉淮鹽岸銷  
之滯至今日極矣引地旣不可復如加釐復停川鹽輕  
價搶跌其爲淮厲胡所底止然則此舉固川淮之大防  
豈獨裨於餉源哉志宜昌加釐

光緒十年七月鹽政曾國荃奏近來鄂湘兩岸增引而未  
增銷售數良形疲滯收數自難充盈凡進籌餉之策者  
無不以規復引地淮銷必暢爲言但川楚軍餉攸關疊  
經各前任剴切敷陳無不梗議中止值此多事之秋未  
便與鄰省力爭另生枝節而江南進項短絀凡有應放

之防餉及六七兩月增募新營添置槍礮器械子彈軍火籌備犒賞以及奉調赴通州廣東廣西之向食江甯餉者用款日增目下支絀萬狀舍就鹽斤設法別無良策本年二月湖廣督臣卞寶第已奏請川淮鹽斤一律加價每斤二文厥後護理湖南撫臣龐際雲將南省所行粵鹽奏請仿照鄂省加價均經部臣議准試行然此皆取之於楚民而於川販不相干涉查同治元年前督臣曾國藩初定淮鹽章程川鹽加稅本定每斤八文旋因行之日久改爲每斤收錢五文現在川鹽由萬戶沱一帶運入楚境者仍前暢旺足見川利較淮爲厚擬將

內  
川鹽每斤加抽三文名雖新增實祇復初行時之舊於  
川鹽成本所增無多於江南此次續添新營之餉畧資  
裨補如荷

俞允卽由臣揀派大員馳赴萬戶沱設局按斤抽收川鹽釐  
金錢三文隨時報解接濟江南各營軍餉將收解數目  
彙入半年造報咨部以重稽考奉

旨著照所請欽此

光緒十年八月著湖廣總督卞寶第湖北巡撫彭祖賢奏  
據湖北布政使蒯德標等會詳稱鄂省定劃界銷川以  
來一切餉需悉取給於川鹽釐課上年兩江議在銷川

界內開設淮鹽子店照川鹽章程完納鄂釐先於螺山岳口繼於沙市樊城等處開設總店分店淮綱已逐漸規復川銷不免遲滯本年籌辦江防餉無所出暫議川淮行楚每斤加價二文以爲修理田家鎮礮臺添買外洋礮火及增募新勇兩營之用係抽之食戶所出無幾於商運毫無窒礙且川淮並收辦理一律於售價尤無高下之殊現兩江復奏請專加川課每斤三文在萬戶沱設立局卡抽收名雖酌濟淮餉實則暗禁川商使之價高難售況淮鹽已在川界設店試銷減價敵川貴賤懸殊川鹽本有難支之勢若再加抽川課三文則成本

頓增定難虧本出售其裹足不來可以操券必致化官而爲私奸販日多將見遍地皆私緝不勝緝且利在必爭性命不顧萬戶沱設局抽收未必不滋意外之事轉恐淮銷亦因之沖動愈難疏銷徒損於鄂無補於淮坐視鄂省歲收一百餘萬之餉一旦歸於無著本省支解各款從何設措當此時事多艱籌辦江防雖有門戶堂奧之分究屬同一喫重目擊庫空如洗本省支應不敷外省協餉全停近又迭奉

諭旨募勇聽調提督程文炳卽日援閩添募各營餉需軍火籌措維艱百貨釐金自被子口稅侵占以後收數大不

如前近復風鶴頻驚商販稀少長江上下游同此一水  
收數奇絀大率皆然此川課驟難加增實情詳請奏懇  
停止前來臣等伏思淮鄂脣齒相依彼此原無膜視江  
省因餉絀籌及加價固非得已而川課爲鄂省餉源所  
繫自應通籌兼顧見雖艱窘萬狀不得不於無可設法  
之中籌一委曲兩全之法擬請將鄂省奏定江防經費  
川鹽每斤加價二文外再酌加一文仍歸宜昌鹽局抽  
收共計三文抽留一文半歸鄂讓出一文半解淮似此  
變通辦理商本尙無大虧於兩江防餉不無裨益應請  
毋庸在萬戶沱設局以節糜費而防阻遏旋經曾國荃

覆奏該司道深恐川本加重川販裹足於鄂餉有礙所慮未始無因不知臣若有意阻川何難踵各前任之奏與川鄂奏爭今卞寶第等摺內謂名雖酌濟淮餉實則暗禁川商似係揣度之詞非臣本意且旣擬加釐以濟然眉頒發告示內首禁浮收留難不使川販有絲毫受累片刻阻滯斷無欲求釐旺暗禁川售之理至淮南於分川界內設立子店螺山岳口雖減淮價川販同時並減未能收敵川之效沙市樊城南經派員開設能否稍稍疏通尙無把握本年上半年淮銷連閏計算比較上兩屆雖不致短絀而毫無起色不得謂淮綱已逐漸規



復查宜昌局川鹽加稅本年上半年收數比較上兩屆雖多一閏月而增收至五六萬串不等不得謂川銷因之遲滯川鹽運鄂既較前暢行其獲利之厚可知且引地久假不歸不能不共圖保衛鄂中擬於川鹽每引加價二文外再行酌加一文准鄂各半分解如此委曲求全在鄂省施之無傷於惠在江南受之未免不安蓋鄂省因江防需費而奏加此價何能舍己而從人江南因軍餉極艱而赴鄂收釐何能攘彼而予此說者謂鄂中此奏或因萬戶沱在宜昌之上游該處抽收核實將來宜昌局恐致公私掣肘不能不羣起阻止不知宜昌地

勢不及萬戶沱之扼要川販繳釐後難保絕無繞越境  
異勢殊本難比而同之已函致鄂省決不以萬戶沱之  
收數責宜昌仿行宜昌局儘可率由舊章以釋鄂省之  
疑但川釐既加以後川本不無增重川販卽能勉力鄂  
中難免藉口必使成效可收庶幾人言不惑卽如臣於  
本年三月間蒞任適值卞寶第奏請淮鹽加價惟時淮  
南官商亦嘖有煩言或請奏停或請酌減眾論紛紜臣  
處以鎮靜咨明鄂中先行試辦三箇月察看有無流弊  
再行酌核辦理至今商亦帖然見值江南奇窳輪船勇  
糧無著萬戶沱設卡固不便因浮議而中絀亦不敢執

已見以相爭惟有仰懇

天恩俯准臣查明前奏試辦數月如果川鹽竟因之而停鄂  
餉竟因之而絀臣卽當奏請撤局如能相安無事則於  
鄂省無損於江南有益自能源源解濟俾補軍儲奉

特旨允行

光緒十年十月四川總督丁寶楨奏兩江總督擬在萬戶  
沱加抽川鹽釐金每斤三文當卽轉飭遵辦去後茲據  
總辦鹽務候補道夏時會同鹽茶道崧蕃詳稱伏思江  
省議加川鹽釐在萬戶沱設局抽收自係爲籌畫餉需  
起見若於川省引課楚省釐金均無關礙而又有益於

江省餉源亟應權宜辦理然而揆度情勢實有窒礙難行者查川鹽近年成本過重每引萬斤運至宜昌實需本銀三百餘兩在楚售銀每百斤價僅三兩一二錢上下是川商每引獲利不過數兩多至十餘兩而止覓在楚省每斤加抽二文川商利息已微而猶勉強運銷者誠以血本攸關不得不借運行新引爲收還舊欠地步且川淮併收亦難獨有所藉口是以竭蹶從事然已嘖嘖嗟怨今若每斤又加三文則每引必虧本二三十兩又獨抽川鹽不抽淮鹽相形之下川鹽益覺危懼勢將羣相裹足川省每年濟楚應行七八千張之引廠竈所

添七八千萬斤之鹽從何銷售商疲厥困引積課懸其  
有害於川一也楚省近年所抽川鹽已不逮前然每年  
尙能收銀八九十萬至百萬不等大宗餉源全恃乎此  
一旦川鹽不行釐金驟絕失此鉅款餉需何出其有害  
於楚一也江省務於萬戶沱扼要抽釐設使各商畏阻  
停舟不下勢不能憑空抽收必至私販羣起多方繞越  
巧爲偷漏疆界相錯防不勝防宜沙一帶固易充斥卽  
武漢等府亦不難浸灌欲抽釐而無釐可抽欲復淮而  
淮終難復徒使楚省坐失自然之大利川省亦少數千  
之引課而於江省仍未見有裨益其無利於江又一也

况萬戶沱係湖北川鹽計岸埠口每年額行鶴峯長樂等八州縣計引二千數百張且例准歸州巴東等處居民購食而宜昌下游之灣潭漁陽關等處則又爲鶴長本岸運道必由之路川省計鹽與淮岸行銷之川鹽迥別今江省若於川省埠口設局必致引岸混淆恐各計商因之觀望惶惑停引不行不特額引積滯而八州縣亦復淡食堪虞詳請據情奏咨前來臣伏查川商在楚售鹽近已由楚省加釐二文若江省再加抽三文較楚省所加尤多商力實有不支况川江險灘林立節年鹽船失事虧本已多川商持本求利誰肯甘心折耗勢將

擡價顧本而楚民食慣川鹽誰肯任從加增勢必尋釁  
滋鬧減價則病商加價則病民病商則慮走私病民則  
虞生事商爲川民岸爲楚地萬一釀成事端咎將誰歸  
況乎正商阻絕梟販橫生引旣不行釐亦無出弊有不  
可勝言者又查萬戶沱乃川鹽行楚計岸埠口今竟聽  
江省設局抽釐則川省引岸混淆江楚疆界不分恐亦  
無此政體通籌再四實於三省有損無益嗣於十一月  
戶部議奏查外患未平餉源竭蹶籌議加抽鹽釐本  
朝廷萬不得已之舉乃江督奏請萬戶沱設局始則楚省  
以爲事多窒礙今則川省以爲有損無益各執一說若

折衷至當於軍餉究屬有無補益應仍請

旨飭令丁寶楨會同曾國荃與卞寶第彭祖賢懍遵九月間諭旨力顧大局和衷商確迅速妥議奏明辦理該督撫等公忠素著必能不分畛域江鄂同一籌備軍需多收一分之釐卽可多濟一分之餉庶於江海各防均有裨益奉旨依議欽此

光緒十年十一月加抽川釐局道員黃祖綸稟加抽川鹽釐金每斤收錢三文業經憲台暨署湖廣督憲湖北撫憲先後出示曉諭各在案茲定於十一月初一日在萬戶沱設立分局專司查艚又於平善壩派員掣驗並在



宜昌同日開設總局照章收釐凡川鹽船隻一到萬戶  
沱暫行停泊由該分局查明艙口包數填給艙單卽聽  
該船開行持赴平善壩呈繳以憑掣驗另給斤單再赴  
宜昌總局照章完釐換給憲台頒發聯票至沿途查艙  
掣驗給發艙單斤單概不准收取分文如有需索准該  
商船隨時喊稟立拏重究嗣於十一年正月川督咨請  
暫行撤局曾國荃覆咨查加抽川釐自開辦以來川鹽  
源源而來商民相安卽鄂釐亦有增無減以後循此成  
法妥爲辦理

光緒十年十一月湖北加釐局提調陳鍾蕃稟十月初八

日由宜昌赴萬戶沱該處在巴峽萬山之中山坡上祇居民三十一戶每戶小屋三間川省設有分銷局專銷大甯鹽於歸興巴陽四州縣每年約銷鹽二百多萬斤此項鹽斤並不抽釐川省每年貼鄂省稅銀一萬二千兩鄂省設有緝私卡專禁子鹽上坡蓋以山上有通於南府小路又恐侵越大甯鹽也其實川販到此並不停泊以水勢建瓴雖欲泊而不得下卽巴東縣相距不足十里鄂省設有察驗水卡專查艙口包數委員司事均住江邊船中遇有鹽船另乘小划趕赴鹽船查驗利其過行再下九十里爲歸州鄂省設有緝私卡亦禁子鹽

上岸灑賣再下一百四十里爲三道坪鄂省設有分銷局專銷子鹽以此處屬東湖縣界不應食大甯鹽而子鹽未到宜昌尙未納稅不准發賣又不能使民淡食故設局分銷以便民再下八十里爲平善壩距宜昌三十里此處已出峽口水勢較平可以靠船鄂省設有察驗卡川販到此停泊委員照艚單點驗蓋戳持赴宜昌再行提包稱驗照章納稅發給水程方准開艚發賣此鄂省設局抽釐之實在情形也回至宜昌據鄂省鹽局總辦陳道建侯稱收捐章程每斤向收釐錢十一文半隨收公費一文半後加課錢五文本年又加江防經費錢

二文統計每斤捐錢二十文每包重二百二十六斤以  
四百五十包爲一載每年約一千餘載每包含淮稱一  
百八十五斤除包繩滷耗十九斤按九折核算每包淨  
一百四十九斤六兩四錢向例抽收足錢每千商販貼  
運費五文卽以五文爲局外乾脩及局中司役家人等  
薪水賞號之用每千又改九八錢易銀報解其每千所  
餘之二十文彙解善後局本鹽局各費薪水專在隨收  
公費一文半內開支此鄂省鹽局收支大略情形也伏  
思每包二百斤而包繩滷耗明除十九斤較淮章已多  
此猶可謂藉以恤商耳至九折收捐每包又暗除十六

斤九兩六錢以每斤二十文計之每包少捐錢三百三十二文每載卽少捐錢一百四十九千四百餘文卽以一千載合算每年共少捐錢十四萬九千四百餘千文况不止一千載耶包繩滴耗照除十九斤明示體恤可也九折爲數太多應遵札內核實抽收之諭黃道恐窒礙難行悉照鄂省章程辦理札委卑府在巴東萬戶沱專司查驗艙口包數見於岸上設局巴東江中設立船卡委員司役均住宿其中又另設巡船以便乘赴鹽船查驗不准片刻留難經鹽政曾國荃批仰卽照章認真查驗並將驗過包數按旬報查

光緒十年十二月加釐總局道員黃祖絡稟查川省炭鹽柴鹽兩項向銷於巴東歸州興山長陽四州縣統二鹽而稱之則曰沱鹽其鹽至萬戶沱應卽起坡儲倉運銷於施南六屬及宜屬之長樂鶴峯兩州縣前項沱鹽聞上年鄂省抽釐每年可得一萬數千緡嗣由川省包解沱釐每年一萬二千兩聽其灑賣不復稽查見在鄂省新加江防經費每斤三文此項鹽斤並未照加而江省見加海防經費每斤三文似亦未便加抽按數綜計江省所加三文每年收數不足二千金可置不議以炭鹽而論其色低其味苦目前售價每斤得錢二十九文如

再加鄂省二文江省三文是每斤售價必須三十四文  
恐銷數稍疲川鄂卽因而藉口似可不必遽與計議經  
鹽政曾國荃批允

光緒十年十二月加釐總局道員黃祖絡稟前於十一月初一日在宜昌設立總局萬戶沱設立分局查驗收釐  
自開局以還川鹽船隻源源而來十一月分共收加釐  
錢一萬六千六百七十五千八百五十七文十二月分  
上旬十天收錢一萬二千一百一十二千七百四十九  
文先後四十天綜計收錢二萬八千七百餘千卽湖北  
川釐收數亦且日有起色聞本年所收已有一百八十

萬較諸七八九等年多二三十萬不等鄂省收數既多而川省課釐亦自有盈而無絀是卽商情踴躍之明證於江省餉源不無稍有裨益於三省並無窒礙經鹽政曾國荃咨明湖廣總督四川總督查照

光緒十一年七月加釐總局道員黃祖絡稟查三道坪地方在平善壩以上川鹽過此未經納釐以致私販爭買下灌有礙釐金前經鄂局開設鹽店以濟民食不准鹽船停泊售賣飭令下駛納釐其官店所銷鹽斤照章抽釐以作減價敵私及貼補店用是以此項向不給票不入正款職局勅設數月屢經派員常川稽巡諭令三道



坪所銷鹽斤照納加釐該商等始以鹽船未到宜卡礙難遵繳嗣經商同鄂局再三開導亦卽遵照完釐惟職局該處未設鹽店照鄂店近年售鹽一千四五百包之數計之此項釐金每斤加抽三文全年約有六七百串左右可否仿照鄂省局不入正款貼給稽巡川資賞犒歸入串底活支項下支用經鹽政曾國荃批准

光緒十一年九月加抽川釐局道員黃祖綸稟據川商天興成等稟稱川鹽濟楚捐釐助餉節次徵收每斤已加至十八文前後所納釐稅不下數千萬金去春因江防加錢二文至冬因海防又加錢三文是川鹽一斤除引

課捆力擡力運力繳用不計外在川廠本約需錢二十文富榮渝各釐局暨各關卡處約需錢十文至宜川淮兩局又需錢二十三文商等踴躍遵完不憚輸將者良以法夷披猖有同仇敵愾之志邊氛不靖有門戶堂奧之虞憲奏鈔傳有防撤卽停之語見義思奮雖毀家紓難不辭自加完後民間買食不肯遞加行號運銷安能提售每斤僅售錢五十餘文致商等售鹽一載須折本銀二百餘兩命本虧折勢甚難支其不遽歇業者實緣各號歷年積放外賒數鉅羈絆難停有井竈者又復因井廠產鹽較多藉資銷路茲幸法人納款降

旨撤防可否商知川局道憲於去歲所加江防海防五文內酌減二三詳請江督爵憲會商鄂督撫憲俯准等情經鹽政曾國荃批此項加收川釐固爲海防而設亦因湖北加抽淮釐淮本增重深恐川鹽侵銷愈甚不能不加重鄰釐以保淮局見在法事已平而淮銷日滯川淮情事相同川商所稱命本虧折勢甚難支自係實情將來必須將前項加釐全數奏停以示體恤惟前此係由鄂省先加淮釐今擬裁撤亦應由鄂省先裁庶淮銷不致益滯仰候咨商湖廣督部堂該省所加淮釐究於何時可撤一俟淮釐停收必當將川釐次第奏撤也

光緒十二年六月加釐局道員黃祖絡稟據川商等稟稱  
川鹽濟楚以來其釐每斤已加至十八文前歲江海防  
喫緊又加二三文在楚須上釐錢二十三文力盡難繼  
接運維艱故釐局自今正始至四月底止已少收稅釐  
二十餘萬兩是名雖加抽而實則減短由是以推迨至  
年滿其減短之數必過於加抽之數乞復舊制十八文  
之例於暫加江海防之二三文奏請裁減等情當批查  
上年總督鹽憲批候咨商湖廣督部堂先將所加淮釐  
停收川釐必當次第奏撤嗣准咨復所加淮釐應俟籌  
辦江防挪用各庫銀十二萬兩彌補清楚再行飭停昨

又准咨以勘設海軍鄂省無款協解已奏准將所加川淮鹽釐展緩停收作爲海軍衙門常年經費先後行局各在案茲據前情查核所陳亦尙屬實惟川淮情事相同揆諸情理淮釐未撤川釐似亦難以遽停經鹽政曾國荃批議如該道所批仰卽轉諭遵照

光緒十二年七月署江南布政使田國俊等詳查加釐局所收錢文歷係以錢易銀批解籌防局亦歷照所收銀數開報其所收錢數雖歷准加釐局有旬報月報咨會到局而每兩銀價係合錢數若干迄未咨報有案惟於六月奉行知奏報光緒十一年上半淮南徵收課釐數

目清單內列收加抽川釐錢十一萬八千四百五十八  
千六百九十五文又十年下半截存川釐錢二萬八千  
一百九十二千九百四十六文除解江南籌防局錢十  
萬五千五百十三千一百一十一文實存萬戶沱川釐錢  
四萬一千一百三十八千五百三十文等因是奏報數  
目係以所收錢數列報而籌防局將來報部銷冊案內  
若竟以所收銀數造報誠恐與案不符多所窒礙應由  
加釐局將自設局開辦起按月收支存解並以錢易銀  
各數開具簡明清冊咨送籌防局核辦期於將來銷案  
鍼孔相符所有加釐局每月開支薪糧局費數目原毋

庸開送籌防局查核第因案關奏銷不得不將收支全數通盤核計方昭畫一至前項加釐原爲撥濟籌防經費而設嗣後應由籌防局按照上下半年核明收釐若干截數詳報擬請專據籌防局詳報之數具奏以免參差歧異經鹽政曾國荃批所詳自係爲造報合符起見惟川釐奏明收錢而以銀數造報與奏案未符至銀數之處欲與收錢之處鍼孔相符雖經戶部疊次行文而礙難遵辦緣委解年分月日不能一律有甲年所收之銀而留至乙年始解者有乙年應解之款而先在甲年墊解者兼有局中收錢而易銀呈解又有此局借撥而

彼局解還者畫匪轆轤尾我參差各歸各局稽核易明  
數局互證轉滋淆混此部文不能遵辦之實情也卽如  
五正兩卡向來以錢數造報而支應局所收悉是銀數  
亦從未奉部挑剔應仍歸運司詳報將來設奉部詰卽  
以前情覆之仰卽遵照

光緒十三年二月鹽政曾國荃奏准四川督臣劉秉璋暨  
戶部咨議將江楚加抽川釐自光緒十三年爲始一律  
停止奏奉

諭旨允准分別咨照前來臣查淮南於光緒十年十一月奏  
准川鹽行楚每斤加抽海防釐錢三文原摺聲明如果



川鹽竟因之而停鄂餉竟因之而絀臣卽當奏請撤局  
原係暫時濟急之計並非永遠加抽今奉部議飭停自  
應恪遵辦理惟查當時議加之意固因海防喫緊需餉  
孔殷不得已而出此亦因鄂中加抽江防鹽釐每斤二  
文名雖川淮並加實則淮鹽按引抽收絲毫難短川鹽  
按包計算較爲便宜深恐淮價重於川價川鹽侵淮益  
甚由淮加抽三文旣合借地行銷之誼亦無輕價搶跌  
之虞自加抽以後光緒十一年鄂中抽收川稅比較九  
十兩年均屬有盈而淮南行楚之鹽自鄂中加釐後十  
一十二兩年銷數均形短絀迭據川淮各商稟請停抽

加釐均經咨明鄂省將加抽淮釐停止卽當接停川釐  
旋准鄂省咨覆以加抽淮釐湊解海軍衙門緊餉未能  
遽停則川釐勢難先停若停川釐而不停淮釐則川鹽  
成本較輕勢必到處侵灌於淮南課餉大有關礙臣接  
到部文復經咨商鄂省將川淮加抽鹽釐訂期同撤茲  
接湖廣督臣裕祿鈔送奏稿請將鄂中加抽川淮鹽釐  
暫展數月自係爲鄂餉一時未能周轉起見川淮事同  
一律淮釐旣緩停收所有淮南加抽川釐三文應請一  
律展緩數月俟鄂省停收淮釐卽將川釐同時並停以  
紓商力而免偏枯奉

硃批著照所請欽此

光緒十三年二月加釐局道員黃祖綸稟奉札開戶部議  
准四川總督劉秉璋奏江楚兩省江防海防加收川鹽  
釐金請卽停止以紓商力一摺自應遵照惟查十一年  
分川鹽到鄂之數比較九十兩年有增無減十二年分  
雖未截數據報亦不過絀且鄂中加收江防經費川淮  
同收每斤二文今川鹽旣停江防二文又停海防三文  
川淮事同一律若不將淮釐二文同時並撤則川鹽成  
本驟輕到處侵灌必致淮鄂課餉兩受其害除咨請鄂  
省將淮釐刻日奏停川淮訂期並撤其未經奏停淮釐

以前不能不暫行照收以杜侵銷而保引岸查此案前奉憲諭將四川督憲奏請停止一摺鈔稿飭知當將川楚各商已接有電傳各鹽船率皆停泊平善壩以上未卽下駛往後收數必暫形減色情形稟陳在案旋據川商稟謂此案已奉川督示諭以江海防加釐見經戶部議准自十三年正月爲始一律停收惟未見兩江督憲明諭究於何日停止懇請示諭卽經職道批以兩江加釐固由本省餉需支絀亦由引岸被占鄂省又加收淮釐致淮銷愈滯淮課愈絀不得已而議加川釐爲補苴之計今奉四川督憲奏准將江鄂加抽江海防鹽釐

一併停止則淮釐自應俱停不獨該川商等之利抑亦  
淮商之利惟見奉湖北督撫憲以目前鄂省餉力萬難  
周轉已奏請展緩停止仍與淮釐照常加收等因是兩  
江加釐停與不停總以鄂省能否停止淮釐爲斷該商  
等知兩江加釐以鄂省淮釐停否爲去留江省並無成  
見始將已掣各船陸續來局完釐惟停泊平善壩以上  
之鹽船聞有多號而投掣赴宜者總屬寥寥蓋因湖北  
督撫憲雖有展緩之奏尙未明奉

諭旨不免意存觀望查鄂省於本年正月奏請展緩謂鄂省  
目前餉力萬難周轉應完洋款應撥海軍衙門經費本

年尚須籌湊懇請暫爲展緩數月仍與淮釐照常加收以收足十餘萬兩爲止卽將川淮兩項鹽釐加價一律奏明停止應卽日出示曉諭使川商知淮釐未停川釐暫當照收一俟鄂省奏停淮釐卽將川釐同日停止經鹽政曾國荃批允

光緒十三年十一月鹽政曾國荃奏川鹽行楚每斤加抽釐錢三文當時議加之意固因海防需餉亦因湖北加抽淮釐江防釐錢每斤二文深恐川價輕於淮價侵淮益甚嗣經四川督臣劉秉璋奏請將江楚加抽川釐一律停止經湖廣督臣裕祿以湖北添撥海軍衙門要餉

不敷周轉奏請將停收限期暫爲展緩數月臣以川淮事同一律鄂加淮釐旣准緩停淮加川釐自宜同時展緩於光緒十三年正月奏奉

諭旨允准在案滿冀湖北將加抽淮釐停收則淮南所加川釐亦可相繼議停見准湖廣督臣先後來咨以湖北因恭辦

大婚典禮要款舍前項加釐別無挹注奏准請將川鹽加價仍與淮釐照舊抽收知照前來臣查川鹽借銷楚境多方繞越防不勝防本駸駸乎有侵淮之勢今淮釐未停淮本較重自不便先停川釐使川價益輕有礙淮南課

餉仍應隨同鄂省照舊抽收俟鄂省停收淮釐再將淮  
加川釐議停免啟畸輕畸重之弊奉

硃批著照所請欽此



兩淮鹽法志卷一百二十四

兩淮鹽法志

卷一百二十四

鄰稅門

湖北宜昌加釐

三